

Bosna i Hercegovina  
Federacija Bosne i Hercegovine  
Tuzlanski kanton  
GRAD TUZLA  
**GRADSKO VIJEĆE**  
Broj: 01-05-5463-2014  
Tuzla, 29.12.2014. godine

## SREDSTVIMA JAVNOG INFORMISANJA

T U Z L A

**PREDMET: Dostava zaključka,**

Na 4. redovnoj sjednici (drugi dio) Gradskog vijeća Tuzla, održanoj dana 01.12.2014. godine, na dnevnom redu, pod tačkom 7. razmatran je:

**APEL NADLEŽNIM ORGANIMA BOSNE I HERCEGOVINE ZA PREDUZIMANJE  
MJERA ZA OBEZBJEĐENJE DOSTUPNOSTI SUDU BIH NOVAKA ĐUKIĆA, OPTUŽENOG  
ZA RATNI ZLOČIN NA KAPIJI**

Nakon obavljene diskusije, Gradsko vijeće Tuzla usvojilo je sljedeći

### ZAKLJUČAK

Usvaja se sadržaj Apela nadležnim organima Bosne i Hercegovine za preduzimanje mjera za obezbjeđenje dostupnosti Sudu BiH Novaka Đukića, optuženog za ratni zločin na Kapiji sljedećeg sadržaja:

Javnosti je poznato, da je 23. 11. 2013. godine Ustavni sud Bosne i Hercegovine usvojio apelaciju odbrane Novaka Đukića, kojom je utvrdio povredu prava iz člana 7. stav 1. Evropske konvencije o ljudskim pravima i temeljnim slobodama i ukinuo drugostepenu osuđujuću presudu Suda Bosne i Hercegovine, kojom je Novak Đukić pravomoćno osuđen na kaznu dugotrajnog zatvora u trajanju od 25 godina, a za dokazani ratni zločin počinjen na Kapiji 25. maja 1995. godine.

Epilog ovakve presude Ustavnog suda, žrtvama i njihovim porodicama, ali i široj javnosti je poznat. Apelaciono vijeće Suda Bosne i Hercegovine je donijelo rješenje kojim se obustavlja izvršenje kazne zatvora u trajanju od 25 godina, jer je prestao zakonski osnov za izdržavanje kazne zatvora i Novak Đukić je pušten na slobodu.

Sud Bosne i Hercegovine je u daljem toku postupka izmjenio ranije donesenu presudu i za ratni zločin na Kapiji 25. 05. 1995. godine Novaku Đukiću odredio kaznu zatvora u trajanju od 20 godina. Međutim, Novak Đukić je pobjegao u susjednu Republiku Srbiju, te kao državljanin Srbije postao nedostupan domaćim organima gonjenja.

Nakon saznanja o bjekstvu osuđenika Novaka Đukića u Republiku Srbiju, pod pritiskom javnosti i žrtava (porodica poginulih i ranjenih na Kapiji), Sud Bosne i Hercegovine je donio naredbu za izdavanje međunarodne potjernice. Istovremeno, predstavnici Suda Bosne i Hercegovine su se pravdali, kako je naredba o upućivanju Novaka Đukića za izdržavanje kazne zatvora pogrešno zavedena u Osnovnom sudu u Banja Luci, što je izazvalo kašnjenja u izvršavanju naredbe. Umjesto da se radi na privođenju zločina pravdi, organi Republike Srbije 04. 09. 2014. godine na vojnom poligonu u Nikincima na teritoriji Republike Srbije, provode

navodnu rekonstrukciju izrežiranu na način da se javnost ubijedi, kako već osuđeni general Novak Đukić, nije odgovoran za zločin na Kapiji.

Gradsko vijeće Grada Tuzle zahtijeva od Vijeća ministara, Ministarstva pravde i drugih nadležnih organa Bosne i Hercegovine, da diplomatskim i pravnim sredstvima poduzmu sve neophodne i dopuštene radnje, kako bi osuđenik Novak Đukić bio izručen Bosni i Hercegovini, a potom i upućen na izdržavanje zatvorske kazne ili da, shodno potpisanom protokolu između dvije države, bude upućen na izdržavanje kazne u Republici Srbiji.

Istovremeno, tražimo odgovornost svih institucija i pojedinaca, koji su doprinijeli, da osuđeni za ratni zločin Novak Đukić pobjegne i izbjegne izdržavanje kazne zatvora, što je rezultiralo dodatnim uznemiravanjem žrtava zločina na Kapiji i njihovih porodica.

U interesu javnosti i žrtava apelujemo na Visoko sudsko i tužiteljsko Vijeće, da preispita da li postoje eventualni propusti i odgovornosti nositelja pravosudnih funkcija, od Ustavnog suda Bosne i Hercegovine koji je donio odluku o ukidanju osuđujuće drugostepene presude, do sudova koji su postupali po odluci Ustavnog suda Bosne i Hercegovine, što je u konačnici rezultiralo stvaranjem uslova da osuđenik Novak Đukić bude pušten na slobodu i pomoglo njegovom bijegu iz Bosne i Hercegovine.

Ovaj apel je namijenjen i sredstvima javnog informisanja.

DOSTAVLJENO:

- 1x Naslovu
- 1x Gradonačelniku Grada Tuzle
- 1x Stručna služba za poslove Gradonačelnika i koordinaciju rada gradskih službi
- 1x Fondacija Istina-pravda-pomirenje iz Tuzle
- 1x Evidencija
- 1x Arhiva

**PREDSJEDAVAJUĆI**

**Jozo Nišandžić, prof.**

